



Conferencia Linguistico Internacional na Aruba ***Society for Caribbean Linguistics ta studia e idioma nan crioyo den Caribe***

E di 20 Conferencia Bienal di Society for Caribbean Linguistics (SCL) ta tuma luga na augustus proximo. Esaki lo ta di dos biaha cu Aruba ta escenario di e conferencia di SCL cu ta wordo organisa cada dos aña. Na 1980, bou di vice-presidencia di Ramon Todd Dandaré Mag. Ling., a tene e conferencia linguistico internacional di SCL na nos isla.

Fundacion Lanta Papiamento (FLP), Biblioteca Nacional Aruba (BNA), Instituto Pedagogico (IPA) y Departamento di Cultura Aruba (DCA) ta anfitrión di e evento aki. Nan ta trahando duro pa realisa e proyecto grandi, hunto cu otro instancia local manera, Departamento di Enseñansa, Universidad di Aruba, Grupo Corector di Papiamento y Fundacion Bon Nochi Drumí Dushi.

Kico ta Society for Caribbean Linguistics (SCL)?

Society for Caribbean Linguistics (SCL) ta un sociedad académico linguístico cu ta studia idioma den Caribe. E sociedad ta publica tur e resultadonan di e investigacionnan cu e ta haci riba tereno di idioma crioyo. SCL a cuminsa cu su trabounan na fin di decada 60. Na 1968 tabatin e Conferencia Linguístico Crioyo na Mona Campus di e Universidad di West Indies na Jamaica. Durante e conferencia aki a lanta SCL. Cuater aña despues na Trinidad & Tobago SCL a keda formalmente estableci y na 1976 SCL a tene su prome conferencia internacional na Universidad di Guyana. Desde e tempo ey SCL ta tene un conferencia cada dos aña na un país diferente den Caribe. E prome presidente di SCL tabata profesor Frederic Gomes Cassidy di Jamaica kende a biba gran parti di su bida na Merca (1907 – 2000). E linguista Arubiano Ramon Todd Dandaré tabata vice-presidente di e sociedad aki na 1980. Dos aña despues el a bira presidente di SCL.